

Daxboh Hab Deng Ndaq

Miz vunz naeuz, ndaw biengz vunzraeuz cienzngaenz ceiq yougaenj, aenvih cienzngaenz hawj vunzraeuz naemj maz ndaej maz; miz vunz naeuz, ndaw biengz vunzraeuz seizgan ceiq youqgaenj, aenvih seizgan bae le mbouj dauq lai. Danhseih gou baenzneix naemjngeix, ndaw biengz vunzraeuz onjndei ceiq youqgaenj, aenvih onjndei caeuq minghvunz doxbaengh doxnangq haenq lailai.

Gou ndaejgeiq miz baez ndeu, daxboh caeuq gou daj Vuzyez Gvangjangz dauqma ranz, mbwn yied bienq yied laep, rumz yied ci yied haenq, duzbeih yied mbin yied daemq, neix gou raen mbwn yaek doek fwnhung lo. Daxboh aeu yaekseiz hai cidienhbingz, yaeuq din hwnj gwnz banjcaij, couh hai ci doz gou sohsouh ganj dauqma ranz, rumz youq henz rwz gou ci “huhu”, youq gyang mbwn laepngauq gwnzhaenx, sing byaj lumj duznyaen yak ndaw ndoeng nei rongx bae rongx dauq.


Daengz giz sokloh song ga loh doxgap, gizhaenx miz daenghoengz daengloeg vixyinx, seizhaenx bae soh baihnaj couh dwg daengloeg rongh lij lw sam miux cung, daeng vixyinx gvaq baihnaj ngeuj baihsuix bae lij dwg daenghoengz, lij lw sam miux cung couh rongh daengloeg; danhseih daxboh hai vaiq lai, ci soh hai gvaq baihnaj ngeuj baihsuix bae! Neix baenzlawz ndaej ne? Gou ngamq yaek daezsing daxboh, danhseih mbouj dad lo, cidienhbingz soh baenaj ngeuj coh baihsuix bae lo! Gou cijndei laepda youq, ndaw sim lumj miz duzdouq ndeu diuq “bubbub” mbouj dingz mbouj duenh, gou ndawsim gag gouz mbwn gaej hawj ci dou daemj gij ci soh daeuj haenx. Caeklaiq seizheiq ndei, seizhaenx mbouj miz ci soh daeuj. Gvaq sokloh neix le, gou aensim lumj deng gonj rinhung ndeu dimz coq nei heiq cuengq mbouj hwnjdaeuq, gvaq liux vanzlij raen dwglau lailai, daxboh baenzlawz cung

daenghoengz ne? Yienghneix guh couh dwg dawz mingh mbouj dang mingh bw!

Dauq daengz ranz le, gou cingq-ging dangqmaz naeuz daxboh: “Daxboh, mwngz lumz raeuz gaxgonq guh cozyez gvendaengz baenzlawz bauj ndaej onjndei luma? Deng ciuq gij gvidingh gyaudoeng bae hengzguh bw! Yienznaeuz ‘yaepseiz bengz lumj gim, gim cawx mbouj ndaej saekseiz’, danhseih mwngz mbouj ndaej ganj seizgan couh dawz mingh mbouj dang mingh ha!”

“Seizhaenx gou raen yaek doek fwnhung, couh lumz lo.” Daxboh gaeu-gaeu gyauej najnyaenq le naeuz, “Lwg ha mwngz gangj ndaej doiq! Daxboh hab deng ndaq! Seizgan youqgaenj, minghvunz lai youqgaenj, neix daxboh geiq maenh lo, baelaeng deng haeujsim bauj ndang mingh ndaej onjndei, ciuq gvidingh gyaudoeng bae hengz!”

Dwg ha, minghvunz caeuq onj-



ndei doxnangq guhdoi, mbouj haeujsim bauj onjndei, minghvunz hix mbouj miz lo, seizgan caeuq cienzngaenz hix mbouj miz lo. Vunzraeuz mbouj ndaej damdoz fuengbienth couh mbouj haeujsim bauj onjndei, ndigah daxboh baezneix hab deng ndaq dahraix!

(Fungz Yilingz)


Baez Daih'it Ndot Dangz Lumz Mbouj Ndaej

Baez gou dauqngeix baez daih'it ndot dangz, couh gag najhoengz lai. Gij saeh haenx couh lumj lix youq baihnaj nei, lumz mbouj bae saek di.

Miz ngoenz ndeu, banhaet seizcou, gou cingq hwnj dangz Yinghyij. Gyoengq doengzhag cungj rox gou mbouj maij dangz Yinghyij, gou gag nyinhnaeuz hag ndei yijvwnz couh baenz lo, gou youh mbouj ok rogguek bae, hag Yinghyij miz maz yungh ne? Hwnjdangz seizhaenx gou raen mbwq lai lo, sawqmwh miz aen naemjap ndeu, ndot okbae yaep ndeu ba! Hoeng mbouj rox baenzlawz ndot okbae ne? Cingq youq seizhaenx, gou yaengx fwngz sangsang bae, lauxsae raen le couh naeuz: “Vanz Cinzsoz, mwngz gingz fwngz guhmaz?” Gou naeuz: “Gou yaek bae diengzhaex.” Lauxsae naeuz: “Gou cingq hwnj-dangz, mwngz yaek bae diengzhaex, mbouj ndaej.” Yienghneix le, aen dajsuenq gou mbouj ndaej hengz lo, gou lij deng lauxsae ndaq geij coenz dem.

Gvaq yaep ndeu couh roengz-dangz lo, lauxsae naeuz: “Vangz Cinzsoz doengzhag, mwngz ndaej okbae lo.” Baezneix gou ndot dangz mbouj ndaej le, sim lij mbouj fug, gou dajsuenq daengz dangz Yinghyij laeng le, gou soh deuz bae gizwnq ndoj youq.

Neix daengz dangz Yinghyij laeng gou couh ndot dangz lo. Gou cingq youq gizwnq guhcaemz angq-yangz dangqmaz seizhaenx, deng



ndaw ban dou boux doengzhag “mai j guenj saeh” ndeu raen lo, caemhcaiq beng gou dauqbae hagdangz, gyau hawj lauxsae. Lauxsae mbouj fatheiq coq gou, cij lwnh aen goj “manaez daeuj lo” hawj gou dingq. Gangj liux le, lauxsae naeuz gou: “Mwngz seizneix couh dwg bouxnyez haenx, langhnaeuz mwngz cingq langh yiengz, raen mbwq le couh yaeuh vunz, liuxle gag yaeuh vunz yaeuh swheij ma?” Gou han naeuz: “Mbouj.”

Gou rox aen gojgaeq lauxsae gangj hawj gou nyi haenx miz aen dauhleix ndeu: Guh boux siujhagseng ndeu, raeuz mbouj ndaej gangj yaeuh, yaek guh boux nyez ndei ndeu, simsoh, gangj daengz guh daengz.

(Vangz Cinzsoz)

Buekcam

Beixmbauq ha, mwngz naeuz vamoiz ak raixcaix, dwg aenvih de youq gyang rumzbaek fawnit hailangh, dwg lwi?

Fawnit nit dangqmaz bae, rumzbaek haenq dangqmaz bae, mbouj miz ndokva lawz ngah youq fawnit hailangh, cungj gyaenz gag caemrwgrwg deqcaj fawhraeuj ndwi.

Vihmaz vamoiz hailangh angqyangz lailai ne?

De dwg gwedgalaux rumzbaek nitsisi neix dahraix go, de dwg dauehgyo fawnit nitsisi neix dahraix go!

De gyaenz fawnit vunz lai cungj haemz haenx dahraix go,

De haemz fawhraeuj vunz lai cungj gyaenz haenx dahraix go.

Dwg lwi? Fawhraeuj raeujrubrub daengz gvaq, ndokva rim bo angqfaengfaeng hailangh, de couh baenz mak soemjsetset mbouj miz saek ngoenz bienq van.

Vunz lai bouxboux cungj doeknaiq caemrwgrwg seizde, de couh angqvauvau; vunz lai bouxboux cungj angqvauvau seizde, de couh naiqnetnet. Beixmbauq ha, cungj ndokva neix dwg-gyaenz ha?

(Daj 《Bonjsei Sim Lwngnyez》(Veiz Gizlinz raiz) senj okdaeuj, Lwgfwngz-meh/卢奋长 hoiz)

